

大明集

卷之十九



21

大明集禮卷十九

嘉禮三

冊皇后

總叙

古者天子之配曰妃。未有后之稱也。**周**禮始曰王后。未有皇后之號也。**秦**稱皇帝而其后曰皇后。**漢**高祖以漢王即皇帝位。立呂氏為皇后。然冊命之儀猶未備也。至靈帝立宋美人為皇后。乃御章德殿。命太尉持節奉璽綬讀冊。皇后北

面稱臣妾。跪受冊璽。此皇后親受命於天子之始也。**晉**武帝臨軒發冊。遣太尉冊皇后楊氏。百僚上禮。此天子臨軒遣使冊拜皇后於其宮之始也。若夫**唐**制。凡遣使冊皇后。則先有奏告天地宗廟之儀。其行冊禮。則備音樂儀仗之用。其禮畢。則有謁廟受賀宴會之節。**宋**初立后。惟用制書。不行冊禮。自仁宗立皇后曹氏以後。冊璽之制。與奏告之儀。視唐為尤盛。**元**制冊后。其奏告遣使與唐制同。冊禮畢。則皇后至大明殿謝而已。

國朝冊立

皇后先期奏告

天地宗廟至日

皇帝臨軒發冊

皇后受冊於宮中。禮畢謁謝

太廟。今集歷代禮物儀文以著于篇。

冠服

皇帝臨軒冊后。其冠服則唐用袞冕。宋服通天冠。絳紗袍。皇后受冊冠服。漢首飾用假結。步搖簪珥。服用蠶服。青上縹下。如深衣之制。唐首飾用大小花各十二樹。兩博鬢。花鈿十二。服用禕衣。宋因唐制。冠加九龍四鳳。元皇帝臨軒及皇后受冊。皆用其國俗衣冠。

國朝冊立

皇后。

皇帝臨軒服袞冕。

皇后受冊。首飾以九龍四鳳。大小花各十二樹。并兩博鬢。寶鈿十二。服用禕衣。歷代之制。並見於冠服篇。

車輅

皇后受冊車輅。漢制法。駕用金根車。重翟羽蓋。加青交絡帷裳。唐制。內僕陳重翟車於肅章門外。宋制。亦用重翟。陳于穆清殿。今擬

國朝

皇后受冊。車用重翟。其制見車輅篇。

冊

按冊制。**漢**因**周**以竹簡聯貫。每簡長三尺。短者半之。其次一長一短。中有二編之形。下附篆書。

唐因**漢**制。謂之策書。亦用漆書篆字。然皆不見為冊后之用。至於**宋**初冊后。皆寫告身。用遍地塗金花龍鳳羅紙。以金塗為縹袋。仁宗時冊后。方用珉玉為五十簡。簡長一尺二寸二分。厚五分。標首四枚。長隨簡。闊四寸四分。其簡并標首上下邊。以金毬紋攔界。鐫金字。及兩頭用金絲。

條結子共二枚。其用標頭二條。畫神。二條畫鳳。

上下皆有金條串貫。襯以錦褥。覆以銷金夾帕。

匣隨冊之長短。以朱漆金塗銀裝。襯以錦褥。覆

以銷金夾帕。其腰輿行馬。檐床等。皆用朱紅漆。

金塗銀裝。**元**冊后亦以玉為冊。其文真書鐫刻。

內填以金。其簡從文之多少。以定數。每簡長一

尺二寸。闊一寸二分。厚五分。聯以金縷。首尾結

帶。前後四簡。琢為龍形。若捧護之狀。縷以金籍。

以錦。覆以紅羅泥金夾帕。冊匣長廣。取容其冊。

塗以朱漆金裝。隱起突龍鳳。金鎖錯匣上。又以紅羅繡蟠龍。盛金帕覆之。承以鍍金裝長干牀。龍首鍍金魚鈎。籍匣褥以錦緣。又以紅絲條縈匣外。其行馬飾以鍍金。冊案用朱漆。覆以紅羅銷金衣。

國朝立

皇后用金冊金字二片。每片依周尺長一尺二寸。濶五寸。厚二分五釐。字則依數分行。鐫刻真書。每片側邊上下有竅。用紅條聯貫。開闔如今

書帙之狀。背各用紅錦嵌護。藉以紅錦小褥。冊盪以木為之。飾以渾金。灑粉蟠龍。用紅紵絲纈裏。內以紅羅銷金小袱裹冊。外以紅羅銷金夾袱裹之。五色小條縈于匣外。臨冊之日。置於紅漆輿案。案頂有紅羅灑水。用檐床二舉之。

冊文

漢靈帝冊宋美人為皇后。其文曰。惟建寧四年七月乙未。制詔。皇后之尊。與帝同體。供奉天地。祇承祖廟。母臨天下。故有莘與殷。姜任母周。三

代之崇。蓋有內德。長秋宮闕。中宮曠位。宋美人
垂淑媛之德。體河山之儀。威容昭耀。德冠後庭。
羣僚所咨。人曰宜哉。卜之著龜。卦得坤乾。有司
奏議。宜稱綏組。以母兆人。今使太尉襲持節奉
璽綬。宗正祖為副。立美人為皇后。其往踐爾位。
敬尊禮典。肅慎中饋。無替朕命。永終天祿。**唐**德
宗立皇后王氏。其冊文曰。皇帝若曰。乾坤合德。
聖人則之。惟帝承天。惟后配帝。嗣續百代。毋臨
萬邦。位定于中。而尊加于外。德脩於已。而化被
于人。御於家邦。所繫斯在。三代崇替。靡不由之。
予是以詢眾採賢。重難斯命。中壺虛位。於今歷
年。陰儀或虧。宗事無主。闕於典禮。朕甚愧焉。稱
是徽章。聿歸全德。咨爾淑妃王氏。天與純粹。氣
鍾元和。含章在中。發秀于外。卓爾風操。穆然容
輝。周旋中規。進退有度。仁愛恭儉。稟于生知。詩
書禮樂。成自師氏。竭其孝敬。祇事先朝。承事無
違。克諧尊旨。往居桂苑。淑問以彰。洎奉椒塗。謙
光載路。言無伐善。志在匿瑕。柔嘉自持。喜愠莫

見六官攸序。九族以親。嘗屬艱迍。累從行幸。思
賢才以輔佐。知臣下之勤勞。庶績伊宜。頗資內
助。永念傾筐之志。且懷求劍之情。崇位長秋。永
懷盛典。矧惟元子。貞我萬邦。稽以舊章。是宜從
貴。今遣攝太尉某官某持節冊命爾為皇后。嗚
呼敬哉。王教之端。始于內範。風美關雎之化。雅
詠思齊之德。罔懈厥位。忝于前脩。克念有終。庶
無後悔。奉承休命。可不慎歟。**宋**仁宗冊皇后曹
氏。其冊文曰。皇帝若曰。天地定位。陰陽相感。人

道貫之。以綱大倫。后德配之。以熙內治。聖人有
以端其本也。故造舟之迎言乎備。詩人有以美
其化也。故周南之風著乎始。粵朕冲昧。祇若不
構。深惟承荷之重。輔佐攸艱。用簡納賢明。協於
人神之望。咨爾贈尚書令冀王曹彬孫女。惟乃
祖克有武功。勤勞在家。保勲不伐。享厥終慶。教
流後昆。薰然慈和。善祥憑積。生此邦媛。其漸漬
醇醲。發聞馨香。所從來遠矣。起居禮習。不待姆
師之訓。風容矩度。自為宗黨之憲。長秋曠位。陰

教未序。咨爾訓範。統正六列。宗公鼎臣。誦言于朝。願即嘉時。聿興典禮。朕以春秋之義。必娶大國。摯疇之家。乃稱福耦。謀及泰筮。聘以穀珪。惟吉之從。有命既集。今遣使工部尚書同平章事李迪。副使戶部侍郎參知政事王隨。持節冊命爾為皇后。欽哉。夫惟肅恭。可以事上。夫惟謙裕。可以接下。泰而能約。則驕弗至。動而慎思。則悔弗萌。懋乃后德。脩乃嬪職。奉承宗廟。儀刑家國。永綏無疆之祚。不其韙歟。

元

世祖至元三年冊

皇后甕吉刺氏。其文曰。帝王之道。齊其家而天下平。風教所基。正乎位而人倫厚。爰擇配以承宗事。若稽古以率典常。咨爾甕吉刺氏。淑哲溫恭。齊莊貞一。屬選賢於中壺。躬受命於慈闈。勗帥來嬪。蹈桀儀之有度。動容中禮。謹夙夜以無違。茲表式于宮庭。宜崇推其位號。乃涓吉日。庸舉彝章。今遣太尉太師秦王中書右丞相持節。以授玉冊寶章。命爾為皇后。於乎。乾施坤承。克順成於四序。日明月麗。久臨照於萬方。朕欲躋

世於乂安。爾其助予之德化。共御亨嘉之運。益延昌熾之期。勉嗣徽音。聿修內治。

國朝

洪武元年正月四日冊

皇后其文曰。天眷我家。啓運興王。出自衡門。尊居宮殿。為君為后。可不慎歟。君以仁政慎於正位。撫兆庶而統萬邦。后以懿德慎於治內。表六宮而母天下。長久之道也。咨爾馬氏。同勤勞於開創之時。由家成國內。助良多。今遣中書丞相善長捧金冊金寶。立爾為皇后。其敬乃職。遵古道。耿先後世。於乎戒之。

寶

皇后寶璽

前漢

用金璽螭虎鈕

後漢

用赤紱玉

璽

唐用金。更名寶。

宋

亦以金為之。方二寸四分。

刻篆文曰皇后之寶。鈕作螭螭。四廂并背皆鈿。螭水地。裹以銷金夾帕。納以朱紅漆匣。匣用金鍍銀裝。匣內金鍍銀檢。檢上勾勒皇后之寶四字。又有伴寶環及寶斗。加以三重朱紅漆盃。皆用金鍍銀裝。飾蓋以夾帕。其腰輿行馬檐床竿。

等皆用朱紅漆。金銀裝。**元**制以玉為寶。用蒙古字刻。其文隱起。填以金。譯曰皇后之寶。其制廣四寸九分。厚一寸二分。螭龍鈕。紱用暈錦大綬。赤小綬連玉環。又玉檢高七寸。廣二寸四分。皆飾以金。裹以紅錦。及紅羅泥金夾帕。納於小盃。盃以金裝。內設金牀。暈錦褥。飾以玻瓈碧鈿珊瑚金精石瑪瑙。又盃二重。皆裝以金。覆以紅羅繡帕。承以鍍金裝長干牀。鍍金魚鈎。藉盃以錦褥。其行馬飾以鍍金。寶案用朱漆。覆以紅羅。

金衣。

國朝

皇后金寶龜鈕朱綬。文用篆書曰皇后之寶。依周尺方五寸九分。厚一寸七分。寶池用金。闊取容寶。寶匣一副。每副三重。外匣用木。飾以渾金。瀝粉螭龍。紅紵絲襯裏。中匣用金。釵造螭龍。內小匣仍用木。飾以渾金。瀝粉螭龍。紅紵絲襯裏。小匣內置以寶座。四角雕螭龍。飾以渾金。座上用小錦褥。褥上一置寶。一置寶池。用銷金紅羅。

小夾袱裏寶。其匣外各用紅羅銷金大夾袱覆之。臨冊日置於紅漆輿案。案頂有紅羅瀝水。用擔床二舉之。

節

按節之制。**漢**以竹為之。柄長八尺。以旄牛尾為旄三重。**唐**制節垂畫木盤三。相去數寸。隅垂赤麻。銅龍一首。紫纁為袋。油囊為表。其冊后皆命太尉持節。**宋**制黑油木盤。鑰石葉段釘子。梅花絲。黑漆木桿。長一丈二尺。鑱擺鐵鑽。碧油絹夾

袋。紫綾夾絹裏夾袋各一。**元**制金塗龍首竿。上施圓盤。朱絲拂八層。韜以黃羅雲龍袋。其冊后亦皆命太尉持節。

國朝冊拜

皇后遣中書丞相持節。其制朱漆杠。金龍首。上施圓盤。旄牛毛纓八層。金銅鈴。韜以黃羅繡龍袋。

樂

唐制冊后。皇帝臨軒遣使。設樂懸於庭中。皇帝

出入。奏太和之曲。太尉出入。奏舒和之曲。皇后受冊。亦設樂懸於宮中。皇后出入。奏正和之曲。內外命婦出入。奏舒和之曲。**宋**冊后。皇帝臨軒。遣使殿庭展宮架。皇帝陞座及降座。奏乾安之曲。冊使出入。及冊寶出門。皆奏正安之曲。皇后受冊於宮中。亦展宮架。皇后出閣。奏坤安之曲。冊寶入門。奏宜安之曲。皇后降殿。奏承安之曲。受冊。奏成安之曲。陞座。奏和安之曲。內命婦入門。奏惠安之曲。外命婦入門。奏咸安之曲。皇后降座。奏徽安之曲。歸閣。奏泰安之曲。**元**冊皇后。用大樂。奏雲和安和二樂。

國朝冊立

皇后。

皇帝臨軒。及

皇后受冊。皆用大樂。如朝賀儀。其制見俗樂篇。

儀仗

唐皇帝臨軒。列黃麾仗。鈚戟近仗。皇后受冊。諸衛勒所部屯門列仗。**宋**制皇帝臨軒。列黃麾細

仗。皇后受冊。則設黃麾仗。**元**冊皇后。設內外儀仗七百四十八人。

國朝

皇帝臨軒遣使及

皇后宮中受冊。其儀仗皆與朝賀儀仗同。

執事

漢臨軒冊皇后。則太尉為使。掌持節奉璽紱。宗正為副。掌讀冊。中常侍掌樂。太僕掌奉璽紱於殿前。女使婕妤掌受皇后所受璽紱。昭儀掌受

璽紱以帶皇后。**唐**制冊后。臨軒命使。太尉為正

使。司徒為副使。尚舍奉御掌設御幄座。守宮掌

設羣官使客諸親陪位者次。太樂令掌設宮懸。

協律郎掌舉麾偃麾。鼓吹令掌設十二案。乘黃

令掌陳車輅。尚輦奉御掌陳輿輦。諸衛掌設儀

仗。典儀掌設文武官及使客諸親執事官版位

於殿庭。及行禮則唱禮。贊者掌承傳。奉禮掌設

百官版位於門外。通事舍人掌引禮。侍中掌奏

中嚴外辦。承制宣制。及奏禮畢。符寶郎掌奉御

寶黃門侍郎掌持節授太尉。主節掌執節。中書侍郎掌引冊琮璽以授太尉。其皇后官中受冊。守宮掌設使副及外命婦次。尚寢掌設御幄座。受冊位。及命婦脫舄席。司樂掌設宮懸舉麾位。及帥樂工。內僕掌進重翟車。諸衛掌設列仗。典儀掌設使副。內侍內謁者監及執事者位。內謁者掌設外命婦朝位於朝堂。司贊掌設內外命婦及內官典贊司贊位於殿庭。及唱禮。掌贊掌承傳。內侍掌奏中嚴。內謁者監掌置冊璽案。謁者掌引使副及執事官。內典掌引外命婦。典樂掌舉麾偃麾。司賓掌接引外命婦入殿。尚儀掌贊皇后行禮。及奏外辦禮畢。內給事掌傳告使副語於司言。司言掌引尚宮。及傳奏使副承制語於皇后。及承宣皇后令旨。及受皇后所受冊。尚宮掌引皇后陞殿。及稱制宣冊。以冊授皇后。內侍掌受使副冊琮璽綬以授內謁者監。內謁者監掌引內給事。及奉冊琮璽綬入殿。尚服掌授皇后琮璽綬。司寶掌受皇后所受琮璽綬。

宋

制臨軒命使殿中監掌率尚舍設御座香案及施簾大晟掌展宮架設舉麾押樂位儀鸞司掌設文武官及應行事官次冊寶幄次尚輦掌陳大輦列御馬尚書兵部掌帥其屬列黃麾細仗典儀掌設受制宣制奉節官位權置冊寶褥位應行事官位及行禮則掌贊禮贊者掌承傳大樂正掌帥樂工協律郎掌舉麾偃麾管勾內臣掌承旨降冊寶出內禮直官掌引百官中書侍郎掌押冊門下侍郎掌押寶及率掌節者至冊

使前受節以授冊使捧冊寶官掌率執事人捧舉冊寶禮直官通事舍人太常博士掌同引押冊押寶官冊禮使副及引左輔右弼左輔掌奏中嚴外辦承制宣制及奉寶授副使右弼掌奉冊授冊使符寶郎掌奉御寶禮儀使掌道皇帝陛殿及奏禮畢其皇后宮中受冊司樂掌宮懸兵部掌設黃麾仗司贊掌設內外命婦內官位及引外命婦就次典樂掌舉麾內侍掌請中嚴奏外辦司言掌引尚宮及受皇后所受冊尚宮

掌引皇后升殿。內給事掌傳奏冊使承制言於
皇后。內侍掌受使副冊寶以授皇后。及宣制讀
冊贊皇后。內謁者監及管勾內臣掌持冊寶入
殿庭。司寶掌受皇后所受寶。**元**冊皇后。太尉一
負為使。司徒一負為副使。主節官一負。捧冊官
二負。舉冊官二負。讀冊官二負。捧寶官二負。舉
寶官二負。讀寶官二負。禮儀使二負。內臣職掌
八負。接冊官二負。接寶官二負。閣門使二負。宣
徽使二負。中宮內臣一十負。代禮官一十六負。


國朝冊拜

皇后其執事見于儀注


陳設

唐制冊皇后。臨軒遣使。設御幄於太極殿。設羣
官客使等次於東西朝堂。展宮懸於殿庭。設麾

於殿之西階。陳車輅輿輦。設解劔席於懸西北橫街之南。設文武官諸親客使位於殿前。又設文武官諸親客使位於門外。諸衛勒所部列黃麾大仗屯門。鉞戟近仗入陳於殿庭。其皇后宮中受冊。則於肅章門外道西近南。設使副等次。東向北上。命婦朝堂設外命婦次。設御幄座於正殿南向。設皇后受冊位於殿庭階間北向。設命婦等脫舄席於西階前近西東向。展宮懸之樂於殿庭。設麾於殿上西階之西。進重翟車於

肅章門外道東西向。以北為上。諸衛勒所部屯門列仗。及陳布於殿南門外。設冊使副及內侍倅舉冊案官及琮璽綬者位。設內給事內謁者監位。設外命婦位。設內命婦及內官非供奉者位。設司贊典儀位。冊皇后。皇帝臨軒命使。設御座於文德殿當中南向。施簾於殿上前楹。設香案於殿下螭陛間。展宮架之樂於殿庭橫街之南。設舉麾位於宮架西北東向。押樂位於宮架之北北向。設文武百僚及應行事官次於朝

堂之內外。冊寶幄次二於殿後東廂俱南向。陳大輦於殿西階下東向。列御馬於殿門外東廂西向。列黃麾細仗於殿庭。設冊使副受制位。設承制官及宣制官奉節官奉冊寶官位。設權置冊寶位二於橫街南黃道東稍北西向。冊北寶南。褥位一於受制位稍北。以俟使副受冊寶。設應行事官位及典儀贊者位。其皇后宮中受冊。設皇后座於穆清殿南向。東西房於左右稍北。東西閣於殿後之左右。設皇后受冊位於殿庭。

階間北向。設冊寶位四。其二在殿東階之東西向。其二在殿西階之西東向。設冊寶幄二於殿門外。設行事官及外命婦次於門外之左右。設黃麾仗於穆清殿內外及皇城裏角門內外。設冊寶使副位內侍位。舉冊寶案位。內給事內謁者監位於殿門外。設內外命婦及內官非供奉者陪列位。設司贊典贊位皆於殿庭。冊皇后。設發冊案於大明殿御座前稍西。發寶案於稍東。設香案於皇后殿前。冊案於殿內座榻前稍

西寶案於稍東。受冊案於座榻上稍西。受寶案於稍東。設冊使副及冊寶官主節官禮儀使位於大明殿庭。皇后殿庭亦如之。

國朝冊拜

皇后。

皇帝臨軒。及

皇后受冊。其陳設並見儀注

班位

漢制臨軒冊后。則百官陪位。太尉立階下東向。

宗正大長秋西向。**唐**臨軒遣使。文官一品至五

品位在懸東。六品以下在橫街南。皆重行西面

北上。武官一品至五品位在懸西。六品以下於

橫街南。皆重行東面北上。朝集使位各分方於

文武官當品之下。諸親位於四品五品之下。皇親

在東。異姓親在西。蕃客位各分方於朝集使六品之南。

諸州使臣分方於朝集使九品之後。典儀位於

懸東。贊者二人在南少退俱西向。使者受節位

於大橫街南道東。副使又於其東少退俱北面。

其門外版位。並如元日之儀。其皇后宮中受冊。使者位在肅章門外之西。東向北上。內侍於使副南設舉冊案。及琮璽綬者位南向差退。俱東面。內給事位於北廂南向。內謁者監位於其東南西向。外命婦位於命婦朝堂。分左右廂。大長公主以下在東。夫人以下在西。並每等異位。皆重行南向北上。內命婦及內官非供奉者位於受冊正殿之庭東廂西向。重行北上。內命婦等朝位於殿庭御道東。重行北面西上。外命婦朝

位於殿庭御道左右近南。大長公主以下在東北面西上。太夫人以下在道西。每等異位重行北面。以東為上。司贊位於東階東南。典贊二人。在南差退俱西向。**宋**制臨軒遣使。則使副受制位在橫街南。北向東上。左輔承制位在御座東。宣制位在冊使位之東北。並西向。門下侍郎奉節位及左輔右弼奉冊寶位。在使副東北西向。應行事官位在受制位北。西向北上。典儀位在宮架東北。贊者二人在南。少退俱西向。其皇后

宮中受冊班位。則與唐制同。**元**冊皇后使副位在殿庭中。奉冊官在右。奉寶官在左。禮儀使位在冊案前。主節位在冊使之左。皇后殿庭亦如之。其百官班位。一品至九品。序列于崇天門外。文班自外旁折位入日精門。武官自外旁折位入月華門。各就東西起居位立定。然後就丹墀位。

國朝冊拜

皇后。

皇帝臨軒遣使。

皇后宮中受冊班位。並見于儀注圖本

奏告

古者冊后必先奏天地宗廟。示不敢專也。**周****漢**奏告之儀未見。**唐**遣官祭告圓丘。方丘。太廟。皆行一獻之禮。天地用玉幣酒脯。皆不作樂。**宋**制遣官奏告圓丘。方丘。宗廟。行一獻之禮。與唐同。併告社稷。岳瀆。山川。在京十里內神祠。用籩豆酒脯。**元**制先期太常奏告天地於南郊。及告宗

大明集禮 卷十九
廟用酒脯行一獻禮。今擬

國朝冊立

皇后先期奏告圓丘方丘宗廟。用香幣酒脯行一獻禮。其儀見天地宗廟篇。

賀禮

晉武帝冊皇后楊氏。百僚上賀。**東晉**成帝冊皇

后杜氏。羣臣畢賀於太極殿。皆不詳其儀。**唐**冊

皇后畢。羣臣上禮賀皇帝。則於東朝堂叙位。禮

部郎中以表授中書舍人。羣臣再拜。中書舍人

奉表入進。在外諸州等官並拜表稱賀。其皇后

受內外命婦賀。則於受冊後升御座。內外命婦

初賀再拜。致詞曰。伏惟殿下坤象配天。德昭厚

載。凡厥兆庶。不勝慶躍。致詞訖。再拜。承令旨訖。

又再拜。其受羣臣賀。則如正冬之儀。唯賀詞云。

具官臣某等言。伏惟殿下徽猷昭備。至德應期。

凡厥黔黎。不勝慶躍。**宋**制皇后受冊訖。內外命

婦賀與唐同。其內命婦賀詞曰。伏覩受冊楓宸。

流徽椒極。懽均六寢。美繼二南。恭惟皇后慈惠

儉勤柔明莊裕。誕膺金璽。增煥玉衣。妾等幸比
貫魚。獲陪賀燕。願益遵於嬪則。庶永賴於母儀。
外命婦賀詞云。伏覩恩敷丕冊。位正中宮。縟典
既成。驩聲胥洽。恭惟皇后稟姿玉粹。毓德蘭芳。
禮斯備於嬪虞。治將聞於翼夏。妾等叨聯近列。
夙仰懿模。欣覲光儀。敢伸頌詠。其羣臣則於東
上閣門拜表賀皇帝。拜箋賀皇后。政和禮儀。則
皇帝御紫宸殿。受宰執以下文武百僚稱賀。如
正至之儀。其文臣侍從以上。武官遙郡以上。皆
進馬。舍人奏某官姓名以下進奉。元皇后受冊
畢。詣大明殿謝恩。訖。皇后陞座並坐。右丞相祝
皇帝皇后壽。進酒進表箋禮物。今擬



皇后受冊寶訖。仍服首飾禕衣。升座受內外命
婦賀。次日羣臣上表上箋稱賀
兩宮。

皇帝服袞冕御

奉天殿受賀。其箋則內使監令奉入

中宮。其在外有司上表賀。

皇帝。上箋賀。

皇后。

會禮

唐制皇后冊禮畢。皇帝會羣臣與正冬會儀同。但上壽詞曰。具官臣某等言。皇后坤儀配天。德昭厚載。克崇萬葉。明嗣徽音。凡厥兆庶。載懷鳧藻。臣等不勝大慶。謹上千萬歲壽。皇后會外命婦。亦如正冬會儀。上壽詞曰。具位妾姓等言。伏

惟殿下坤儀配天。德昭厚載。率土含識。不勝忭舞。謹上千萬歲壽。皆樂備而不作。蓋取古禮娶婦三日不舉樂。謹幽陰之義也。**宋**制皇后受冊及命婦賀畢。皇后更常服。內侍承令宣外命婦入。皇后升座。會外命婦如宮中常儀。皇帝則御紫宸殿。會三公以下文武百官。作樂三舉酒。尚食進御食。太官設羣官食。初則班首進皇帝酒。次則殿中監少監進酒。**元**制皇后受冊禮畢。右丞相帥百官賀皇帝皇后於大明殿。訖宴殿上。

如正至之儀。今擬

國朝

皇后受冊畢。

皇帝會羣臣於

謹身殿。

皇后於

中宮會內外命婦。其儀皆如正至宴會之儀。

謁廟

唐制。皇后受冊畢。謁見太廟。先遣太尉設樂行

事。其祝文曰。維某年歲次某某月某朔某日。孝曾孫皇帝臣某。謹遣太尉臣某。敢昭告于皇祖某。謚皇帝。皇后妾某氏。將伸祗見。謹以一元大武。明粢薌合。鄉其嘉蔬。嘉薦尚饗。遍獻各廟。畢。然後所司陳小駕鹵簿。皇后首飾。褱衣。乘重翟車。至廟。行朝謁之禮。前再拜。後再拜。禮畢。改着鈿釵禮衣。升車。鼓吹振作而還。**宋**制。皇后受冊畢。服首飾。褱衣。乘重翟車。亦陳小駕鹵簿。朝謁景靈東西宮。前再拜。上香畢。再拜。內外命婦俱

陪位。元至大皇慶時。冊后畢。皆遣官恭謝太廟。樂用登歌。禮行三獻。而無皇后廟見之儀。今擬

國朝

皇后受冊畢。

皇帝先遣官用牲牢詣

太廟行事。告以

皇后將祇見之意。其儀與時享同。遣官之日

皇后降香。告官捧香至

廟告畢。

皇后首飾禕衣。乘重翟車。親行謁

廟之禮。內外命婦俱陪祀。其禮見于儀注

奏告

園丘儀注。

其禮見祀天篇奏告儀。

奏告

方丘儀注。

其禮見祭地篇奏告儀。

奏告

宗廟儀注。

其禮見宗廟篇奏告儀。

冊拜

皇后儀注。

發冊。

前一日內使監設

御座於

奉天殿如常儀尚寶卿設

御寶案於

御座前侍儀司設冊寶案於

寶案之南。

冊東寶西

設奉節官位於冊案之東掌節

者位於奉節官之左稍退俱西向設承

制官位於奉節官之南西向設奉冊奉寶官位

于冊寶案之西東。又設使副受

制位於橫街之南北向東上設承

制官宣制位於使副受

制位之北西向設奉節官奉冊奉寶官位于使

副東北西向。又設使副受冊寶褥位於受

大明集禮 卷十九
制位之北北向。典儀二人位於

丹陛上之南。東西相向。贊禮二人位於使副受制位之北。東西相向。知班二人位於贊禮之南。東西相向。設文武百官侍立位於文武樓之北。東西相向。文武侍從班位於

殿上之左右。引文武班舍人四人位於文武官之北。稍後。東西相向。引禮二人位於使副之北。東西相向。拱衛司光祿寺官對立位於

奉天殿門之左右。東西相向。將軍二人位於

殿上簾前。東西相向。將軍六人位於

奉天門之左右。東西相向。又將軍四人位於

丹陛上之四隅。東西相向。又將軍六人位於

奉天殿門之左右。東西相向。鳴鞭四人位於

丹陛上北向。是日金吾衛陳設甲士儀仗於

午門外之東西。拱衛司陳設儀仗於

丹陛

丹墀之東西。和聲郎設樂位於

丹墀之南。禮部設

龍亭儀仗大樂於

奉天門外正中。以俟迎送冊寶至

中宮。質明擊鼓初嚴。催班舍人催百官具朝服。
道

駕官侍從官入迎

車駕次嚴。引班舍人引文武百官入就侍立位。
引禮引使副具朝服入就

丹墀受

制位。諸執事者各就位。三嚴。侍儀奏外辦。御用

監奏請

皇帝服袞冕。御輿以出。尚寶卿前導。侍從警蹕
如常儀。

上位將出。仗動。大樂鼓吹振作。至

奉天殿升

御座。樂止。尚寶以

寶置于案。捲簾。鳴鞭。報時雞唱訖。禮部官捧冊
寶各置于案。奉節官承

制官。奉冊官。奉寶官及掌節者各入就

殿上位。西向立定。舉冊寶案四人入立於奉冊
奉寶官之後。典儀唱鞠躬。拜興。拜興。拜興。
平身。使副鞠躬。樂作拜興。拜興。拜興。平身。
樂止承

制官進詣

御座前。跪奏請發

皇后冊寶。承

制訖。由

中門出。中陛降。至宣制位。稱有

制。典儀唱跪。使副跪。承制官宣

制曰。冊某氏為

皇后。命公等持節展禮。宣訖。由

殿西門入復位。贊禮唱俯伏興。使副俯伏興。奉

冊奉寶官率執事者舉冊寶案由

中門出。中陛降。奉節官率掌節者前導。至使副

受冊寶褥位。以案置於褥位之北。冊東。寶西。掌節者

脫節衣。以節授奉節官。奉節官搢笏受節。以授

冊使。冊使搢笏跪受。以授掌節者。掌節者跪受。

興立於冊使之左。奉節官出笏退。引禮引冊使詣受冊褥位立定。奉冊官搢笏就案取冊以授冊使。冊使跪受冊。復置於案。奉冊官及冊使皆出笏退復位。引禮引使副至受寶褥位。奉寶官搢笏就案取寶以授使副。使副搢笏跪受寶。興復置於案。使副及奉寶官皆出笏退復位。典儀唱鞠躬。拜興。拜興。拜興。平身。使副皆鞠躬。樂作。拜興。拜興。拜興。平身。樂止。引禮引冊使押冊。使副押寶。掌節者前導。舉案者次之。初

行。樂作出。

奉天門。樂止。掌節者加節衣。奉冊寶官皆搢笏詣案取冊寶安置。

龍亭中。奉冊寶官退。執事者舉案退。儀仗大樂迎。

龍亭以行。執節者行於

龍亭之前。使副行於

龍亭之後。迎送至

中官門外。初冊寶將出門。侍儀跪奏禮畢。

皇帝興。樂作。還宮。樂止。引班引文武官以次出。

受冊

前一日。內使監官陳設

皇后御座於

中宮殿上如常儀。設香案於

殿庭之正中。設權置冊寶案於香案之前。冊東寶西

設

皇后受冊寶位於冊寶案前北向。設司言司寶二人位於

皇后位之北。東西相向。設奉冊寶內官位於冊寶案之南。東西相向。設讀冊寶內官位於奉冊寶內官之南。東西相向。設內外命婦位於庭下左右。東西相向。又設內外命婦賀位於殿中北向。尚儀二人位於

皇后拜位之北。東西相向。司贊內官二人位於內外命婦立位之北。東西相向。又設權置冊寶案於

中宮門外。設內使監令位於案之東西向。設奉

冊奉寶內官位于內使監令之左右。稍退。俱西向。使副位于案南北向。引禮二人位于使副之前。東西相向。掌節者位于冊使之後。其日所司設儀仗於

殿庭之東西。擊執於

殿上之左右。樂工陳樂於

殿庭之南。冊寶將至

中宮門。尚儀奏請

皇后首飾。褱衣。出閣。樂作。至

殿上南向立。樂止。司言司寶立於後。及冊寶至宮門。使副於

龍亭中取冊寶。權置于門外。所設案上。引禮引使副及內使監令俱就位立定。次引冊使於內使監令前。稱冊禮。使臣某。使副臣某。奉

制授

皇后冊寶。退復位。內使監令入詣

皇后殿。躬言訖。出復位。引禮引內外命婦俱入就位。讀冊寶內官。及司贊內官俱就位。引禮引

冊使取冊授內使監令。內使監令跪受。以授奉冊內官。冊使退復位。引禮又引使副取寶授內使監令。內使監令跪受。以授奉寶內官。使副退復位。以俟官中行禮。內使監令率奉冊奉寶官各奉冊寶。以次入詣。

皇后受冊位前。以冊寶各置於案。冊東寶西尚儀引皇后降詣庭中。受冊位立定。侍從如常儀。司言司寶各就位。內使監令率奉冊奉寶內官取冊寶。以次立於

皇后之東西向。內使監令稱有制。尚儀奏拜興。拜興。拜興。拜興。

皇后拜。樂作。興拜興。拜興。拜興。樂止。內使監令宣

制訖。奉冊內官就案取冊。授讀冊內官。讀冊訖。跪以授內使監。內使監跪以冊授

皇后。

皇后跪受訖。以授司言。奉寶內官就案取寶。以授讀寶內官。讀寶訖。以授內使監令。內使監令

引禮又引外命婦班首一人入就

殿上賀位。其行禮並如上。內命婦賀儀司贊唱禮畢。引禮引內外命婦出。初行樂作出門。樂止。尚儀奏禮畢。引

皇后降座。樂作。還閣。樂止。

百官稱賀上表箋儀注

皇后受冊禮畢。至晚。內使監於

奉天殿陳設

御座香案。尚寶司設

寶案於香案之北。侍儀司設表案位於香案之南。又設表箋案位於

丹墀北之正中。設

文官起居位於

丹墀之東南。南向。武官起居位於

丹墀之西南。東向。文官拜位於

丹墀中之東北。每等異位重行。北向。西上。武官

拜位於

丹墀中之西北。每等異位重行。北向。東上。殿前

班諸執事起居位於武官起居位之北東向。侍從班諸執事起居位於文官起居位之北西向。殿前班指揮司官三員侍立位於

丹陛上之西東向。光祿寺三員侍立位於

丹陛上之東西向。侍從班文官立位於

殿上之東。侍從班武官立位於

殿上之西。拱衛司官二員侍立位於

殿中門之左右。典牧所官二員侍立位於仗馬

之前。東西相向。受箋內使監官一員位於

丹墀表箋案之東西向。宣表官一員。展表官二員。位於

丹墀表箋案之西東向。糾儀御史二人位於展表官之南。東西相向。內贊二人位於

殿上東西相向。典儀二人位於

丹陛上之南。東西相向。知班二人位於文武官

拜位之北。東西相向。通贊贊禮二人位於知班

之北。東西相向。通贊在西。贊禮在東。引文武班

舍人四人位於文武官拜位之北。稍後東西相

向引殿前班舍人二人位於引武班之南東向。舉表案舍人二人位於引文班之南西向宿衛鎮撫二人位於

丹陛東西階下。東西相向。護衛百戶二十四人位於宿衛鎮撫之南稍後。東西相向。護衛千戶八人位於

殿東西門之左右。將軍二人位於殿上簾前。東西相向。將軍六人位於殿門之前。東西相向。將軍四人位於

丹陛上四隅。東西相向。將軍六人位於奉天門。東西相向。鳴鞭四人位於丹陛上之南北。

其日金吾衛陳軍仗於

午門外之東西。陳旗仗於

奉天門外之東西。拱衛司陳儀仗於

丹陛之東西。及

丹墀之東西。陳車輅於

丹墀之南。典牧所陳仗馬於

文武樓南之東西。虎豹於

奉天門之東西。和聲郎陳樂於

丹墀。文武官拜位之南。內使監官擎執於

御座之左右。侍儀司舍人舉表案入就

殿上案位。舍人二人舉表案伺候於

午門外。文武官具朝服迎表至雲集橋。舍人引

殿前班。司贊贊禮。內贊宿衛鎮撫護衛鳴鞭。各

入就位。侍儀侍從入迎

車駕。

上位陞

謹身殿。侍儀版奏中嚴。御用監官奏請

上位服袞冕。文武官迎表至

午門前。置龍亭於道中。禮部官取表函置於案。

舍人舉案。禮部宣表官展表。官押表案。引丞相

前行。文武官分班俱由西門入。至

丹墀中。禮部官押表案置於

丹墀正中。各就位。文武官各入就起居位。侍儀

奏外辨道。引

大朝集禮 卷十九 二十九
上位御輿以出。仗動。鼓吹振作。尚寶卿捧寶前道。侍衛如常儀。

上位陞御座。樂止。尚寶卿捧寶置於案。將軍捲簾。拱衛司鳴鞭。司晨報時雞唱訖。諸侍從官殿前班。拱衛司官由西階降。引班引同宣表官受表官。受箋內官俱入起居位。東西相向立定。通班唱某衛指揮使臣某以下起居。引班唱鞠躬。平身。引班東西分引至

丹墀中拜位。北面立。贊禮唱鞠躬。拜興。拜興。平身。指揮以下皆鞠躬。樂作。拜興。拜興。平身。樂止。贊禮唱指揮使稍前。指揮使前立。贊禮唱鞠躬。指揮以下皆鞠躬。贊禮唱

聖躬萬福。唱平身。指揮使以下皆平身。唱復位。指揮使復位。唱鞠躬。拜興。拜興。平身。指揮使以下皆鞠躬。樂作。拜興。拜興。平身。樂止。通班唱各恭事。引班引指揮以下皆各就位。通班唱具丞相銜臣某以下起居。引班唱鞠躬。平身。文武官相向鞠躬。平身。引班東西分引入

丹墀中拜位。丞相初行。樂作。至位。樂止。知班唱班齊。贊禮唱鞠躬。拜興。拜興。拜興。拜興。平身。文武官皆鞠躬。樂作。拜興。拜興。拜興。拜興。平身。樂止。贊禮唱進表箋。引班引丞相詣表箋案前。丞相跪捧表。興。跪捧箋。進於受箋官。受箋內使監官接箋入。

中宮啓聞興。引班引復位。丞相捧表與宣表官展表。官由

丹墀西陞陞西門入。至

殿中。丞相跪進表于案。退立於殿南正中。內贊唱跪。贊禮唱跪。

丹墀百官皆跪。內贊唱宣表。宣表官詣案取表。跪讀于殿西。展表官同跪展表。宣表官宣訖。俯伏興。展表官以表置于案訖。內贊與贊禮同唱俯伏興。平身。丞相與

丹墀百官皆俯伏興。平身。與宣表展表官由殿西門出。西階降。復位。贊禮唱鞠躬。拜興。拜興。拜興。拜興。平身。百官鞠躬。樂作。拜興。拜興。拜興。

拜興平身。樂止。贊禮唱搯笏。三舞蹈跪。山呼萬
歲。山呼萬歲。再山呼萬歲。出笏。俯伏興。拜興。
拜興。拜興。拜興。平身。文武官皆搯笏。三舞蹈跪。
三拱手加額。山呼萬歲。山呼萬歲。再山呼萬萬
歲。樂工應和之。出笏。俯伏興。樂作。拜興。拜興。拜
興。平身。樂止。贊禮唱禮畢。侍儀奏禮畢。鳴鞭。
上位興。樂作。導引還
謹身殿。樂止。舍人舉表案出。引班引文武官以
次出。

皇帝會羣臣儀注。

其禮與正至會儀同。見朝會篇。

皇后會內外命婦儀注。

其禮與正至會儀同。見朝會篇。

謁廟儀注

皇后將謁

太廟。

皇帝先遣官用牲牢行事。告以

皇后將祗見之意。其儀與時享同。

見宗廟篇。

祝文臨

時撰定遣官之日。

皇帝降香。告官奉香至

太廟。告畢。

皇后親行謁見前期。

皇后齋三日。內外命婦及執事內官各齋一日。前一日。執事官灑掃

廟庭內外。設

皇后拜位於

廟戶外。又設拜位於

廟中香案前。俱北向。設內命婦陪祀拜位於

廟庭之南北向。設外命婦陪祀拜位於內命婦之南。司贊位於

皇后拜位之東西。司賓位於內命婦之北。東西相向。司香位於香案之右。設盥洗位於

庭階之東。司盥洗官位於位所。各廟皆如前儀。其日清晨。宿衛陳兵衛樂工備樂。尚儀備儀仗

重翟車于

中宮外門之外。陪祀外命婦各具翟衣。集于

中宮內門之外。內使監官奏中嚴。

皇后首飾九龍四鳳冠。褱衣。尚儀奏外辨。導引
皇后出。

內宮門。司贊奏陞輿。

皇后升輿。至

外門之外。司贊奏降輿。

皇后降輿。司贊奏陞車。

皇后陞車。宿衛兵仗前導。鼓吹設而不鳴。次尚
儀陳儀衛。次外命婦。次內命婦。皆乘車前導。次

皇后重翟車。內使監人負扈從。宿衛復陳兵仗
于後。

皇后至

廟門。司賓引內命婦先入就

殿庭東西侍立。司贊奏請降車。

皇后降車。司贊引自左門入就位。北向立。司賓
引內外命婦各就位。北向立。司贊奏拜興。拜興。

司賓唱拜興。拜興。

皇后及內外命婦皆拜興。拜興。司贊奏請行事。

請詣盥洗位引

皇后至盥洗位。奏盥洗。司盥洗者酌水。

皇后盥手訖。奏悅手。司巾以巾進。

皇后悅手訖。司贊奏請詣

神位前引。

皇后由東階陞。至

神位前北向立。司贊奏。上香。三上香。司香奉香進於

皇后之右。

皇后上香。上香。三上香訖。司贊引

皇后復位。奏拜興。拜興。司賓唱拜興。拜興。

皇后及內外命婦皆拜興。拜興。司贊奏禮畢。引

皇后出自

廟之左門。司賓引內外命婦出。司贊奏陞車。

皇后陞車。宿衛陳儀仗。樂工陳樂。尚儀陳儀仗。

內外命婦前導。侍從如來儀。過廟鼓吹振作。還

至

宮之外門外。司贊奏降車。

皇后降車。司贊奏陞輿。

皇后陞輿。至

宮之內門外。司贊奏降輿。

皇后降輿入宮。

遣使冊
皇后丹墀版位

集禮卷十九 四十六

冊位

樂

冊位

冊位

冊陞及
殿上版位

天武將軍

典儀

真三官司揮拍

護衛
護衛
護衛
護衛

天武將軍

將軍

車徒

將軍

車徒

將軍

將軍

天武將軍

護衛
護衛
護衛
護衛

光祿司真

天武將軍

典儀

集禮卷十九 四十七

文官侍立位

護衛百戶十二人

引禮
知班
贊禮

宿衛鎮撫

奉節官
奉冊官
奉寶官

司馬

典儀

引禮
知班
贊禮

宿衛鎮撫

入二十戶百衛護

位立侍官武

門

門

門

中宮受冊版位

內命婦立位

外命婦立位

集禮卷十九 四十八

主節官

承制官

將軍

奉節官

奉冊官

班從侍官文

律

樂

贊

贊

班從侍官武

奉贊官

車

引禮

引禮

大明集禮卷十九

大明集禮

卷十九

十一

司言
尚儀

司贊
尚儀

司贊
尚儀

內使監令

讀冊內官

受冊內官

車馬

祭器

祭服

祭服

祭服

內命婦拜位

內贊

祭服

內贊

